



Gabinete Wever - Croes II

ISLAONLINE

Noticia di Gobierno

2023

Diahuebs 3 Augustus 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023




Como un di e scolnan ganado di e proyecto di Edutech **COLEGIO LAURA WERNET PASKEL A RICIBI CHROMEBOOKS Y TABLETS PA NAN 1STE Y 2DE KLAS**

Manera ta conoci, Gobierno hunto cu Futura a introduci pa e aña escolar 2022 - 2023, e proyecto di Edutech, na unda ta duna oportunidad na tur scol, pa bin cu nan mesun proyecto innovativo, pa asina por gana materialnan digital pa nan scol. Pa e proyecto aki Gobierno a pone un suma di 400 mil florin disponibel pa reparti den 4 diferente ciclo.

Un di e scolnan ganado ta Colegio Laura Wernet Paskel cu ta sumamente contento di ricibi nan chromebooks y tablets pa nan 1ste y 2de klas. Esaki sigur ta un herment cu lo facilita e maestronan grandemente na momento di duna les na e muchanan.

Prome Minister Evelyn Wever-Croes, den nomber di Gobierno di Aruba ta gradici tur scol cu a participa na e proyecto di Edutech durante e ultimo aña escolar y ta encurasha tur e scolnan cu no a participa of gana, pa aplica pa e siguiente aña escolar, pa asina tin e oportunidad pa gana materialnan digital pa nan scol. "Educacion ta e fundeshi pa nos pais por prospera, educacion ta empodera nos habitantenan y ta fortifica nos comunidad y e ta dirigi progreso. Nos sa tambe cu nos mundo ta cambiando na un nivel hopi rapido. P'esey e ta hopi importante pa nos ekipa nos generacion di hobennan cu e hermentnan necesario pa por maneha e retonan y oportunidadnan den e era digital. E unico manera cu por garantiza esaki ta door di siñanan e habilidadnan di siglo 21 pa nan por adapta y ta exitoso," Prome Minister Wever - Croes a enfatisa.



RESUMEN DI SIMAN

Asuntonan General,
Innovacion,
Organisacion Gubernamental,
Infraestructura y
Planificacion Teritorial

PROME MINISTER, EVELYN WEVER-CROES

22 - 28 JULI 2023



• REUNION CU SEÑORA JOCELYNE CROES

Prome Minister a reuni cu e directora nobo di Departamento di Relacion Exterior di Aruba, Directie Buitenlandse Betrekking (DBB), señora Jocelyne Croes. Prome Minister a indica cu actualmente e departamento ta confrontando varios reto, entre otro e reorganizacion y scarcedad di empleado. Gobierno lo sinta hunto cu e directora nobo y e departamento pa asina yega na un solucion pa cu e retonan aki.

• DESVELO DI E SEYO DI ACREDITACION DI JCI



Siman pasa a tuma luga e desvelo oficial di e Certificado di e "Gold Seal of approval accreditation di Joint Commission International (JCI)". E acreditacion aki, no ta algo facil pa haya y pesey ta considera un logro grandi pa pais Aruba y pa ImSan. Prome Minister ta felicita ImSan pa e logro importante aki. y ta gradici Director di ImSan doctor Joel Rajnherc y e team completo di ImSan pa nan trabou duro y determinacion cu awe e acreditacion aki ta un realidad.

• NEGOCIACION ARUBA Y HULANDA


Manera ta conoci durante e pandemia di Covid-19, Hulanda a bay di acuerdo pa sostene Aruba cu un suma di 916 milyon florin pa atende cu crisis. Mirando cu e debe aki lo madura na oktober 2023, Aruba y Hulanda lo mester yega na un acuerdo pa mira con lo refinancia e debe aki. Pa yega na un miho solucion pa cu e refinanciamiento di e debe aki, Aruba y Hulanda ta sigui na mesa.

• EDUTECH

Pa lora ta e final di e proyecto di Edutech pa e aña escolar cu a caba di pasa, Prome Minister ta gradici tur e scolnan cu a tuma nan tempo pa participa y bin cu nan proyecto di innovacion. E proyecto aki tabata un exitoso, na unda varios scol a logra gana fondo pa asina por cumpra diferente materialnan digital, cu lo yuda e docente grandemente na momento di duna les. Tambe Prome Minister ta felicita tur scol ganador.

• LAND ACADEMY

Durante conferencia di prensa di Gobierno, Prome Minister Evelyn Wever-Croes hunto cu cu DRH, a elabora riba e proyecto di Land Aruba Academy, y a indica cu e proyecto aki ta di gran balor pa e empleadonan publico cu ta desea di desaroya nan capacidad y conocimiento,. Cada empleado por haci uzo di e plataforma aki, gratuitamente pa asina engrandecer y/of mantene nan conocimiento "up to par". Prome Minister ta encurasha tur empleado publico pa tuma e oportunidad aki pa asina yuda bo desaroyo personal y yuda nos, hiba pais Aruba dilanti.





VUELONAN DI CARGA ENTRE ARUBA CU VENEZUELA VIA CORSOU TA WORDO PERMITI

Vuelonan di carga indirecto entre Aruba cu Venezuela lo ta permiti atrobe bou di cierto condicionnan. Cu e maneho nobo aki companianan local lo ta permiti pa conduci e vuelonan via Corsou, mientrastanto cu vuelonan similar tambe por wordo opera door di aerolineanan Venezolano.

E prohibicion actual ta keda vigente pa vuelonan directo, incluyendo di pasahero, carga y vuelonan combina entre Aruba y Venezuela. Tambe ta keda prohibi vuelo di pasahero cu escala na un di tres pais.

Ministerio di Transporte oficialmente a anuncia e maneho nobo pa cu trafico aereo di Aruba. E 'Maneho Interino di Trafico' (Interim Beleid Luchtvaart) a keda introduci como reaccion na desaroyonan reciente den e area di aviacion. Cu e maneho aki ta atende e desafionan cu a surgi despues cu Corsou a habri su frontera cu Venezuela mientrastanto cu esun di Aruba ta permanece cera.

E condicionnan specifico cu ta conta pa vuelonan di carga indirecto a keda estableci den e acuerdo bilateral di aviacion. E maneho temporario aki ta establece algun regla cu ta guia vuelonan comercial te ora cu frontera cu Venezuela bolbe habri.

E vuelonan aki di Venezuela pa Aruba (of vice versa) cu escala na un di tres pais lo ta limita na un frecuencia di tres biaha pa siman y lo mester cumpli cu condicionnan stipula pa autoridadnan Arubiano of internacional.



Pa e maneho interino ta necesario cu permisonan comercial lo mester wordo otorga mutuamente, conforme e principio di reciprocidad. Manera a indica, companianan local lo ta permiti pa conduci e vuelonan via Corsou, mientrastanto cu vuelonan similar tambe por wordo opera door di aerolineanan venezolano.

Minister di Transporte lo implementa e maneho aki y conforme decision di Consejo di Minister di Aruba esaki lo permanece na vigor te ora cu frontera cu Venezuela habri di nobo. Pa yega na e maneho aki a pidi consejo di Inmigracion Aruba, Douane Aruba, Directie Scheepvaart, Directie Luchtvaart, Directie Buitenlandse Betrekkingen y Ministerio di Asuntonan Economico.

Cu e maneho nobo aki di trafico aereo, gobierno ta señala su compromiso pa mantene seguridad publico, fomenta practicanan responabel di aviacion y yuda stimula nos economia.



MINISTER MADURO TABATA PRESENTE NA E AWARDS NIGHT DI CARNAVAL 69

Recientemente a tuma luga e Awards Night di Carnaval 69 organisa pa SMAC na unda cu a otorga e diferente premionan na esnan cu a participa y a gana den e diferente categorianan. Tabata un anochi colorido yena cu bon vibra caminda cu a duna aprecio na e creatividad di tur esnan cu a gana den nan respectivo categoria.

Na e ocasion aki, Minister di Cultura tabata tin e honor di entrega e premio pa Banda di Aña cu tabata tin Tsunami como ganador y Grupo di Aña cu a keda pa e grupo TOB. 'Danki cu boso a participa, danki pa comparti boso creatividad pa haci nos celebracion uno grandi y bunita un biaha mas. Danki tambe na Darren van Ommeren, presidente di SMAC, pa su determinacion pa mira nos carnaval riba pia, pa trece tur hende hunto, pa surpasa e obstaculonan cu tin. Masha danki pa un biaha mas haci nos carnaval uno grandi.' Minister Maduro a finalisa.

Minister Maduro a duna un danki ta e team completo di SMAC pa a organisa e tremendo anochi aki y tambe na esnan presente cu a sali ganador den locual ta e exposicion mas grandi di Aruba cual ta nos Carnaval.





POTRETNAN DI AWARDS
NIGHT DI CARNAVAL 69





ROYAL CARIBBEAN LO TRECE MAS TURISTA CRUCERO NA AÑA 2024



Aruba su turismo ta pasando den su miho momento, aña 2023 ta muestra di bay ta un aña record. Pa sigui engrandece nos turismo den aña 2024 ta importante pa sera acuerdonan nobo cu lineanan crucero.

Minister di Turismo y Salud Publico sr. Dangui Oduber ta lidera e delegacion di Aruba cu ta consisti di ministerio di turismo, Aruba Ports Authority (APA) N.V. y Aruba Tourism Authority. Diamars e delegacion di Aruba tawata tin un bon reunion cu ehecutivonan di Royal Caribbean Cruises (RCC). Nan a comparti noticia hopi positivo cu e delegacion di Aruba.

Den e reunion aki RCC a duna di conoce cu den aña 2023 nan lo trece un total di 300 mil turista crucero Aruba. Tambe nan a laga sa cu pa aña 2024 nan lo trece 340 mil turista crucero pa Aruba. E ta un aumento hopi substancial.

Esaki ta demostra e confiansa cu RCC tin den Aruba. Esaki sigur ta muestra tambe e demanda cu tin pa Aruba como destinacion crucero. Minister Oduber ta premira cu aña 2024 ta bay bira un bon aña pa Aruba su turismo.



MINISTER ROCCO TJON:

Ayera merdia, durante noticiero riba canal 88.9, a travez di e programa Enfoke, Patrick Paskel a bolbe menciona cu mi persona tawata sospechoso y a wordo deteni door di landsrecherche tempo cu mi tawata eherce mi funcion den Cuerpo Policial. E biaha aki a referi na un caso specifico y a menciona nombenan di Agentenan Policial cu tawata envolvi.

Na prome luga mi kier bisa cu durante mi carera, trahando pa 17 aña den Husticia, mi a traha na diferente departamento den Cuerpo Policial y tambe mi a traha como director di KIA. Den mi funcion como hefe di e diferente departamentonan y como director di KIA mi a duna na diferente ocasion declaracion na Landsrecherche y na BIV den diferente caso.

Por medio di e comunicado aki, mi ta BOLBE desmenti rotundamente tur cos cu a wordo treci padilanti, durante e programa "Enfoke", cu mi persona NUNCA a participa, tawata sospechoso of a ser deteni den

ningun caso cu nan a trece pa dilanti. Ni den e caso cu a wordo treci pa dilanti den nan programa di diamars, ni den e caso cu nan a trece pa dilanti ayera. Mi nunca tawata deteni na Landsrecherche, sigur no pasobra mi no tawata integro den mi funcion anterior.

Por ultimo mi kier bisa cu e documentonan cu ta ser referi na dje y cu a ser musta den nan programa di ayera, ta documentonan di e caso di mi prome yiu. Documentonan cu mi mes a publica riba mi pagina di facebook y a comparti cu Parlamento despues cu mi a huramenta como Minister di Husticia y Asuntonan Social.

Ta trata un biaha mas di mentiranan indignante, pa es motibo, un keho penal ya caba a ser entrega debidamente en contra di esaki. Adicionalmente mi por agrega cu pasonan legal (civil) tambe lo ser tuma.



**UNION A DEMOSTRA CON MAS FUERTE
NOS POR TA PA CARGA E EXITO DI NOS PAIS!**



MINISTER ENDY CROES A ANUNCIA CU AÑA 2023 TUR SCOL DI DPS LO TA CONECTA RIBA SISTEMA DI DATA

Dienst Publieke Scholen (DPS) tabata e unico “schoolbestuur” cu no tabatin un sistema di data. Durante aña 2023, tur sistema lo ta conecta via cloud. Unabes cu DPS tin tur 20 scol conecta riba e sistema, por tuma decision a traves di data. Tambe, lo conecta tur 20 scol di DPS cu Departamento di Enseñansa via “interface”.

Despues di esaki, ta prepara pa e siguiente stap, cu ta pa entrega e data di tur “schoolbestuur” na Departamento di Enseñansa pa asina tur 85 scol di Aruba ta riba un solo sistema. Esaki sigur lo yuda y facilita Gobierno di Aruba pa tuma decision den futuro a traves di data. Minister Endy Croes a felicita e team di DPS. Un team chikito pa atende cu tanto problema, pero sigur a haci hopi pa e desaroyo di DPS.



MINISTER ENDY CROES TA ELABORA RIBA E SITUACION DI WERKSTER DI E SCOLNAN DI SKOA Y DPS

Recientemente, Minister di Enseñansa y Deporte Endy Croes a papia tocante e asuntonan di werkster di Stichting Katholiek Onderwijs Aruba (SKOA) y Dienst Publieke Scholen (DPS). Pa loke ta trata werkster di SKOA, ta un asunto cu tin varios aña caba andando. Minister Endy Croes a indica cu a trata di bin cu diferente solucion pa e caso aki, pero a laga esaki den man di hues. A base di veredicto di hues, tin cu cobra via “exploitatie” y no den un salario normal.

Pa loke ta trata werkster di DPS, Minister Endy Croes ta en espera di un consejo di Departamento di Recurso Humano (DRH). Desde 4 di januari 2023, tabatin varios reunion tocante e tema aki, pa motibo cu humanitariamente DPS tin algun

werkster cu tin un aña di contract. Esaki ta un preocupacion pa nan cada aña, unda cu cada aña mester renoba nan contract. Minister Endy Croes a expresa cu e no ta haya e situacion aki husto, mirando cu nan no tin un trabou fiho y no por haci prestamo pa cas of auto.

Tambe, tin un otro grupo di werkster cu ta trahando “losse uren”. Nan ta cobra pa e oranan cu nan ta traha. Pues, como cu den e luna di juli nan no ta traha, nan no ta cobra tampoco. Minister Endy Croes a indica cu e ta comprende nan dolor y pa e motibo aki a pidi DRH un consejo pa remedia e asunto aki mas pronto posibel.

EMBAHADORA DI INDIA A BISHITA MINISTER THIJSSEN

Embahadora di India na Hulanda Reenat Sandhu a haci un bishita na Minister Plenipotenciario mr. Ady Thijsen.

Na prome instante e bishita tabata uno pa cera conoci cu otro. Durante di e combersacion den oficina di Minister Thijsen a papia riba diferenten topiconan cu pa tanto Aruba como India ta importante.

Tambe embahadora Reenat Sandhu a informa Minister Thijsen – cu mirando cu e ta embahador pa Reino Hulandes – elo bishita e otro partinan di Reino Hulanda. Su bishita oficial na Aruba lo tuma lugar e luna aki.

Minister Thijsen a gradici embahadora Reenat Sandhu pa e combersacion na antesala di su bishita na Aruba y a bisa di ta spera cu e bishita aki ta uno exitoso y fortalece e lasonan entre India y Aruba.

Reenat Sandhu a keda apunta como embahadora di India na Hulanda desde April 2022.



SIMAN MUNDIAL
DI **LECHI**
MATERNO
1 - 7 aug


Gobierno di Aruba

Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! _____